

Martin Candinas è fitg trumpà, Jon Pult è cuntent

Reaziuns sin la decisiun dal tribunal federal davart las residenzas secundaras

■ (rtr) **En ina discussiun vehementa han Martin Candinas, cusseglier nazional da la pcd e Jon Pult, president da la ps, dibattà davart la decisiun dal tribunal federal.** Candinas è fitg trumpà da la decisiun, Pult da sia vart è perencunter cuntent cun la decisiun ch'il tribunal federal ha prendì. Sin basa da recurs da Breil e da Tavau ha la dretgira federala decidì che las novas ordinaziuns per restrenscher las segundas abitaziuns valian gia davent da la data da la votaziun, vul dir il mars 2012. Quai era sche la dumonda da construcziun sezza è vegnida inoltrada avant ils 11 da mars 2012.

«Ina gronda malgistadad»

Numerus projects da construcziun, che han survegnì la lubientscha anc l'onn passà, ston ils chantuns uss examinar da nov. Decis quai ha il tribunal federal en connex cun in cas a Breil en Surselva. Là ha i dà in recurs cunter ina chasa da pliras famiglias cun 7 abitaziuns. La dumonda da lubientscha per construir questa chasa era vegnida inoltrada suenter il di da votaziun. La lubientscha aveva la supranza communal da Breil concedì l'avust.

Per l'impressari da Breil, *Faustin Carigiet*, è quai ina malgistadad. Persunas che han fatg ina dumonda da construcziun senza ch'igl avess dà in recurs, lezzas dastgan

bajegiar. Ses project, ch'è stà confruntà cun in recurs da vischins, è dentant bloccà.

Tavau tema per plazzas da lavur

Er il president da Tavau, *Tarzius Caviezel*, na chapescha betg la decisiun dal tribunal federal. Sulet a Tavau gijajan a perder 200 fin 300 plazzas da lavur entras l'iniziativa per restrenscher segundas abitaziuns, ha ditg Caviezel a Radiotevisiun Svizra Rumantscha.

Consequenzas per regiuns turisticas

Per chantuns da muntogna sajan las sen-

tenzias da Losanna ina schlaffada, uschia èn s'exprimids plirs exponents. Las consequenzas da l'iniziativa da segundas abitaziuns sentian las regiuns turisticas ussa pli spert che sch'ils projects contestads fissan anc vegnids realisads. Quai ha ditg il secretari general dals chantuns da muntogna, *Fadri Ramming*.

Hansjörg Trachsel è surprais

Il cusseglier guvernativ *Hansjörg Trachsel* è surprais. Numerus experts, giurists e la dretgira chantunala eran da l'avis che l'ordinaziun valia pir a partir dal 2013. El spe-

gia ussa cun interess l'argumentaziun en detagl dal tribunal federal, ha ditg Trachsel a las medias a Landquart. Il cusseglier guvernativ quinta che circa 150 projects da construcziun na possian ussa betg vegnir realisads en il Grischun.

La sanestra è satisfatga

Cuntenta cun la decisiun ch'il termin dals 11 da mars 2012 vala è la cussegliera nazionala da la Partida socialdemocrata, *Silva Semadeni*. Il tribunal federal n'haja betg l'aschà metter sut squitsch da l'industria da construcziun, mabain haja decidì sin basa dal dretg svizzer.

Leuthard prenda per enonuschientscha

La cussegliera federala *Doris Leuthard* ha prendì enonuschientscha da l'emprima decisiun dal tribunal federal. Quai ha communitgà ses departament. Leuthard spetgia sin ulteriuras infurmaziuns ed indicaziuns davart la sentenza.

Success cumplain per Helvetia Nostra da Franz Weber

L'organisaziun Helvetia Nostra è legitimada da far recurs cunter segundas abitaziuns. Quai ha decis il tribunal federal a Losanna sin fundament dad in recurs encunter ina

chasa da pliras famiglias a Savognin ed in recurs encunter ina chasa da pliras famiglias a Mustér.

L'iniziant *Franz Weber* è satisfatg suenter las reaziuns dal tribunal federal. «Quai è ina victoria, quai è insatge grondius», ha ditg Weber als schurnalists a Losanna. Il dretg haja gudagnà, ussa saja dentant da cumbatter vinavant.

Phillippe Roch e Stefan Scheidegger èn satisfatgs

Ina gronda satisfacziun è la decisiun dal tribunal federal per *Phillippe Roch*, in dals chaus da l'iniziativa cunter segundas abitaziuns. Il tribunal federal haja ussa ditg clermain ch'i na dettia naginas excepziuns tar la limita da 20%. Sulet davart la dumonda tge che duai vegnir taxà sco segunda abitaziun dettia inqual spazi da discussiun, di Roch.

In'emprima reacziun datti era da l'Uffizi federal per il svilup dal territori. Per il vice-directur, *Stefan Scheidegger*, è la decisiun dal tribunal federal ina conferma da lur posiziun che l'iniziativa gijaja en vigor il di ch'il suveran haja acceptà quella. Sin las lavurs per la lescha d'execuziun n'haja la decisiun per la lescha d'execuziun n'haja la decisiun dals derschaders a Losanna naginas consequenzas. Era vinavant saja planisà da preschentar la lescha anc avant las vacanzas da stad.



Martin Candinas (san.), cusseglier nazional da la pcd e Jon Pult, president da la ps.

